

\*\*\*\*\*

یوہ آکاشوانی جموں ہے محبوب سلطانے تے نصرت چودھری تیں خبر سُنو۔

\*\*\*\*\*

## HEADLINES

- ۱۔ لیفٹیننٹ گورنر منوج سنہا نے کہیو ہے این۔ڈی۔آر۔ایف آفات سنگ نمڑن، لگن سنگ جان بچان مانہ سب توں اگے رئی ہے۔
- ۲۔ مرکز نے جموں کشمیر سمیت 5 مرکزی زیر انتظام آلا علاقن گا لیفٹیننٹ گورنران نانہ جعلی دوائیاں تے جادوئی دعووں غے خلاف کاروائی غو اختیار دتو۔
- ۳۔ وزیر اعلیٰ نے دلی مانہ امت شاہ سنگ ملاقات کرغے جموں کشمیر گا معاملہ ور گل بات کی ہے۔
- ۴۔ کشتواڑ مانہ دہشت گردان غو پتو لان واسطے آپریشن دوبارہ جاری ہے جس مانہ فوجی ہیلی کاپٹر غی مددلی جارئی ہے جدکہ اک پیرا ٹروپر وی شہید ہو گیو ہے۔
- ۵۔ سنگروٹہ گجرو گا سرکاری ہائر سیکنڈری سکول نانہ وزیر اعظم غی طرفوں یوم جمہوریہ غی تقریب مانہ مہمان خصوصی غا طور ور شرکت کرن غی دعوت دتی گئی ہے۔

\*\*\*\*\*

## LG NDRF

لیفٹیننٹ گورنر منوج سنہا نے اج قدرتی آفات غی روک تھام بارے قومی دستاں این ڈی آر ایف گا یوم تاسیس غا موقع ور اہلکاران نانہ دلی مبارک باد پیش کی تے قوم واسطے ان غی مثالی خدمات نانہ زبردست خراج عقیدت پیش کی، اپنا پیغام مانہ لیفٹیننٹ گورنر نے کہیو ہے این ڈی آر ایف مشکل تے آزمائش گا ویلا مانہ ہمیشہ آفات سنگ نمڑن تے امدادی کاروائیاں مانہ پیش پیش رہی ہے تے اس نے پیشہ وارانہ مہارت تے لگن غو مظاہرو کیو ہے انہاں نے کہیو ہے اس نے قدرتی تے انسانی ساختہ آفات غے دوران جان بچان نقصان کھٹ کرن واسطے تیز تے موثر رد عمل غی وجہ توں پورا ملک مانہ عزت و احترام حاصل کیو ہے اس سلسلہ مانہ ایل جی موصوف نے این ڈی آر ایف اہلکاران غی بے لوٹ خدمات تے عزم نانہ وی سہرایو۔

\*\*\*\*\*

## LG POWERS

بُن پنج مرکزی زیر انتظام علاقن گا لیفٹیننٹ گورنران تے منتظمین نانہ یوہ اختیار حاصل وے غو کہ وہ افسران نانہ کسی وی جگہ غی تلاشی لین یا کسی وی ریکارڈ نانہ ضبط کرن غی اجازت دے سکیں۔ یے اختیار اُن گمراہ گن اشتہارات غے خلاف استعمال کیا جیں گا جہڑا غلط تے گمراہ گن دعوو کریں جیسراں کہ کینسر تے شوگر غا علاج غو چوٹھو دعوو کریں، وزارت داخلہ نے حال ہی مانہ سرکاری گزٹ مانہ ایک حکم جاری کیو ہے جس غے تحت یہ اختیارات جموں

کشمیر، لکشذیب، چندی گڑھ، دادراتے نگر حویلی، دمن تے دیو تے پنڈوچیری غا لیفٹینٹ گورنراں یا منتظیمن نانہہ دتا گیا ہین۔

\*\*\*\*\*

## CM HM MEET

جموں کشمیر غا وزیر اعلیٰ عمر عبدالله نے اج مرکزی وزیر داخلہ امت شاہ تین ملاقات کی۔ یہ ملاقات مختلف معاملات ور گل بات واسطے ہوئی۔ وزیر اعلیٰ نے سماجی میڈیا ور ملاقات بارے جانکاری دتی لیکن انہاں نے یوہ واضع نہیں کیو کہ کن مسائل ور گل بات ہوئی انہاں نے صرف اتنو ہی کہیو کہ گل بات جموں کشمیر تین متعلق معاملات ور ہوئی۔ وزیر اعلیٰ غا دفتر نے سماجی میڈیا ایکس ور جانکاری دیتاواں کہیو کہ عمر عبدالله نے اج نوی دہلی مانہہ مرکزی وزیر داخلہ امت شاہ تین ملاقات کی تے جموں کشمیر تین جڑی کئی اہم مسائل ور تبادلہ خیال کیو۔

\*\*\*\*\*

## SECY TRANSPORT

ٹرانسپورٹ محکمہ غی سیکرٹری اونی لواسا نے اج جموں غا کوٹ بھلوال مانہہ واقع انسٹی ٹیوٹ آف ڈرائیونگ ٹریننگ تے ریسرچ مانہہ جاری کماں غو تفصیلی جائیزو لیو۔ یوہ دورو، مرکزی زیر انتظام علاقہ مانہہ اہم ٹرانسپورٹ ٹانچہ غی تعمیر نانہہ تیز کرن واسطے محکمہ غا خصوصی کوششاں گو حصو تھو دورہ غا آغاز مانہہ سیکرٹری نانہہ ادارا غا اہم حصال غا بارا مانہہ جانکاری دتی گئی جسراں کہ انتظامی تے رہائشی عمارت، مختلف ڈرائیونگ ٹسٹ تے دیگر ترقیاتی ٹہانچہ۔ جہیزو پیشہ ورانہ ڈرائیوراں غی تربیت واسطے تیار کیو جارہیو ہے۔

\*\*\*\*\*

## JMC

جموں میونسپل کارپوریشن، یوم جمہوریہ غی تقریبات غا حصہ غا طور ور شہر بھر مانہہ کئی سرگرمی منعقد کرن جارئی ہے۔ یوہ پروگرام گنتنتر غا فخر، صفائی غا عزم غا موضوع غے تحت منعقد ہو رہیو ہے، جس غو مقصد شہریاں مانہہ صفائی، شہری ذمے داری تے حُب الوطنی نانہہ فروغ دینو ہے۔ پروگرام مانہہ کمیونٹی غی طرفوں چلائی جان آلی سرگرمی شامل ہیں، جسراں کہ اپنی مدد آپ گروپ غی نمائش، عوامی تقریر غو سیشن، دیواراں تے عمارتاں نانہہ خراب کرن غے خلاف مہم، سوریہ پُتری رکشا ابھیان، یہ سرگرمی عوامی شرکت غی حوصلہ افزائی کرے، تانجے جموں نانہہ صاف تے ذمہ دار بنا یو جاسکے۔ جموں میونسپل کارپوریشن، غا کمشنر ڈاکٹر دیوانش یادو نے کہیو کہ یوم جمہوریہ شہریاں واسطے ایک موقعو ہے، کہ وہ فعال طور ور شہر نانہہ صاف تے روشن بنان مانہہ اپنو کردار ادا کریں۔

\*\*\*\*\*

## SEARCH OP

حفاظتی دستاں نے اج سویرے توں کشتواڑ ضلع غا اُچا علاقہ مانہہ کیرا بندی تے تلاشی کاروئیاں نانہہ دوبارہ توں شروع کردتو ہے جس مانہہ فوجی ہیلی کاپٹر غی وی مدد لی جارئی ہے مہارا آکاشوانی جموں گا نمائندہ غے مطابق چھاترو سیکٹر گا منڈرال سنگھ پورہ علاقہ گا نزریکی گراں سونار مانہہ یاہ کاروانی شروع کی

گئی تھی جس نانہہ اتار رات اوکھارستان تے کھٹ روشنی غی وجہ نون عارضی طور ور روک دیتو گیو تھو اس کاروائی گا شروعاتی رابطہ غے دوران فائرنگ گو تبادلہ ہون تے دہشت گرداں غی طرفوں گرنیڈ پھیکن غی وجہ تون 8 فوجی جوان زخمی ہو گیا تھا جنہاں نانہہ علاج واسطے اسپتال ٹوریو گیو ہے اس سلسلہ مانہہ اج نکی لو فوج پولیس تے مسلح فوج نے اس کاروائی نانہہ شروع کیو تے کیرا بندی گا عمل نانہہ مزید سخت کیو تانجے دہشت گرداں نانہہ فرار ہون تون روکیو جاسکے گھنا جنگل آلا علاقہ غی تلاشی واسطے ڈرون کھوجی گُنا گو استعمال کیو جارہیو ہے جدکہ فوجی ہیلی کاپٹر آپریشن آلا علاقہ ور فضائی نگرانی واسطے لگاتار پرواز کر رہیو ہے مزید مہارا ضلع گا نمائندہ نے اس طرح کہیو۔ اونگا اک فوج گو پیرا ٹورویر اج زخماں غی تاب نانہہ لاتا مانہہ شہید ہو گیو ہے بھارتی فوج غی وائٹ نائٹ کور نے اج خصوصی دستاں گا حوالدار گجیندر سنگھ نانہہ زبردست خراج عقیدت پیش کیو جنہاں نے سنگھ پورا علاقہ مانہہ دہشت گردی مخالف کاروائی مانہہ بہادری سنگ لڑتا مانہہ اپنی جان قربان کی ہے۔

\*\*\*\*\*

## GHSS NAGROTA

ضلع کٹھوعہ غا نگروٹہ گجرو گا سرکاری ہائر سکینڈری سکول نانہہ نی تی آیوگ بھارتی حکومت غی جانب تون وزیر اعظم غی طرفوں خصوصی دعوت تون نواز لیو گیو تانجے وہ نوی دلی مانہہ منعقد ہون آلی یوم جمہوریہ تقریب 2026 مانہہ مہمان خصوصی گا طور ور شرکت کرسکیں یوہ سکول پورا ملک غی پہلی 50 اٹل ٹیکننگ لیب مانہہ کارکردگی دسن آلا تعلیمی اداراں مانہہ چنیو گیو ہے تے جموں صوبہ غو واحد ادارو ہے یاہ کامیابی جدت تخلیقی صلاحیت تے ٹیم ورک نانہہ نمایاں کارکردگی غی عکاسی کررئی ہے اس تقریب مانہہ سکول غی نمائندگی اٹل ٹیکننگ لیب گا انچارج جگجیت سنگھ اٹل منٹر شیوانی ورما تے بارہویں جماعت گ ا طالب علم ساکشی ٹھاکر تے پیوش ماگوترا کریں گا۔

\*\*\*\*\*

## SMVDSB VIEW POINTS

گپت نوراتراں غا مقدس آغاز غا موقع ور پُرانا رستہ بانگنگا تیں آدھکوارہ ور واقع سمیر تے امبالیکا قدرتی نظاراں غی جگہ نانہہ مکمل مرمت تیں بعد یاتریاں غی سہولت واسطے دوبارہ تیں کھول دتو گیو ہے۔ ان سہولیات غا شامل ہون تیں ہُن یاتری قدرتی تے پُر سکون ماحول مانہہ کھان پین غی اشیاء غے نال ٹھنڈو تے گرام پین غی اشیاء حاصل کرسکیں گا۔ اس سنگ مقدس یاترا غے دوران یاتریاں نانہہ مزید راحت لے غی۔

\*\*\*\*\*

## DRUG CONTROL RBN

منشیات غی روک تھام بارے محکمہ رام بن نے اس گل ور زور پایو ہے جے اپنا آپ تون دوئیاں گا استعمال تون گریز کریں کیونجے اس سنگ دوئیاں غا خطرناک رد عمل سنگین اندرونی بیماریاں گا چھپ جان جیسا خطرہ پیداوے اس سلسلہ مانہہ دسیو گیو جے اینٹی بایوٹکس غا غلط استعمال تون بیکٹریا مزید طاقت مانہہ ہوجے جس غی وجہ تون دوئیاں غو اثر ختم ہونو شروع ہوجے اس ضمن مانہہ درد غی روک

تھام واسطے دواياں، نيند غى گولياں يا ذہنى دباؤ غى دوائى اپنے آپ نوں لين ور  
عادت ہوسکے اس بارے مزيد جانکاری ديتا وان اسٹينٹ کنٲرولر ڈرگ رامبن سنجيو  
کمار گپتا نے اس طرح کہيو۔

\*\*\*\*\*

## HANDBALL/ BASKETBALL

جموں کشمير پوليس غى باسکٲ بال ٹيم نے اپنا ٹورنامنٹ غو آغاز دوجا آل انڈيا  
پوليس بينڈ بال تے باسکٲ بال کلسٲر 2025-26 تين کيوٲيم نے آئى.ٲى.بى. پى ٹيم غے  
خلاف سخت مقابلہ کرتا وان ايک پائينٹ تين قريبي جيت حاصل کى يہ جيت ٹيم  
واسطے تے ٹورنامنٹ واسطے ايک مثبت آغاز ثابت ہوئى ياه قومى سطح غى  
معاروف ٹورنامنٹ سشاسٲرا سيمابل سيلگوڑى غى طرفوں اج تين شروع ہوئى تے 23  
جنورى 2026 توڑى جارى رے غى۔ اس بڑا کھيڈاں غى تقريب مانہہ ملک بھر تين  
30 پوليس تے نيم فوجى تنظيمان نے حصو ليو ہے تے مردان ، خواتين غا دوان  
زمران مانہہ گل 81 ٹيم مقابلو کررئى ہين۔

\*\*\*\*\*